

關愛的故事



永遠不再偷飯盒

我曾經坐過監，係個釋囚。我仲記得嘍出獄嗰日氣溫只得 13 度，由於飢寒交迫，我逼住去偷飯盒，點知又俾人捉到，法官知道我環境困難，喺法庭慈善箱度擺咗 50 蚊俾我，仲叫我向社會服務機構求助。

我細個嗰陣，爸爸媽媽已經離婚，我要去唔同嘅家庭居住。喺 15 歲我就離家出走，流落街頭、做乞兒，最後仲誤入歧途。由於我偷飯盒嘅事俾傳媒廣泛報導，無見多年嘅阿媽仲透過社工嘅幫忙搵番我，我地兩母子相隔廿幾年後再重逢，真係百般滋味在心頭。

為咗等我有瓦遮頭，社工幫我租咗個房，仲幫我申請緊急援助基金用嚟買日用品，同解決一日兩餐嘅問題。第二日，仲轉介我到搬運物流訓練班。一個月後，我已經搵到搬運嘅工作做。阿媽仲支持我考車牌，希望第時我可以自己開間搬運公司，同樣幫番好似有我嘅經歷嘅同路人。

阿媽曾經患有癌症，而家年紀大、健康差，我好珍惜同佢相聚嘅時間，每星期都會約佢食飯。我答應佢一定會重新做人，而且做一個對社會有用嘅人。

我好多謝當日法官大人對我嘅體諒同幫助，亦多謝社工對我不離不棄嘅關心同支持，你地放心，我永遠都唔會再偷飯盒，我會努力重新做人，希望大家都會俾更生人士一個機會。

(468 字)